



REPUBLIKA E SHQIPËRISË  
AUTORITETI I KONKURENCËS  
KOMISIONI I KONKURENCËS

VENDIM

Nr. 640, Datë 25.07.2019

“Për dhënien e disa rekomandimeve lidhur me ushtrimin e aktivitetit të  
Shoqërisë “Illyrian Guard” SHA”

Komisioni i Konkurrencës me pjesëmarrjen e:

Znj. Juliana LATIFI	Kryetar
Z. Eduard YPI	Zv/Kryetar
Znj. Leida MATJA	Anëtar
Znj. Adriana BERBERI	Anëtar
Z. Helidon BUSHATI	Anëtar

Në mbledhjen e tij të datës 25.07.2019, shqyrtoi çështjen me:

**Objekti:** Për dhënien e disa rekomandimeve lidhur me ushtrimin e aktivitetit të shoqërisë “Illyrian Guard” SHA;

**Baza Ligjore:** Neni 24, shkronja (d), (f) , neni 29/1 dhe nenin 69 dhe 70 i Ligjit Nr. 9121, datë 28.07.2003 “Për Mbrojtjen e Konkurrencës”,

**Komisioni i Konkurrencës**, pas shqyrtimit të:

- Relacionit të Sekretarit të Përgjithshëm të Autoritetit të Konkurrencës;

VËREN SE :

1. Pranë Autoritetit të Konkurrencës, është depozituar ankesa me Nr.354 Prot., datë 03.06.2019, ku shoqata “Union Security Albania” ka paraqitur pretendimet e saj në lidhje me një subjekt juridik të ri të krijuar me VKM Nr. 177, datë 04.04.2019 “Për krijimin e shoqërisë “Illyrian Guard” SHA dhe për përcaktimin e Autoritetit Publik, që përfaqëson shtetin si pronar të aksioneve të kësaj shoqërie”.
2. Me anë të kësaj VKM, është krijuar shoqëria tregtare “Illyrian Guard” SHA me kapital 100% shtetëror zotëruar nga Ministria e Brendshme. Kjo është shoqëri aksionare, e cila do të ofrojë shërbime me pagesë kundrejt subjekteve të treta, publike ose private, në fushën e rendit e të sigurisë publike, teknologjisë së informacionit si dhe çdo shërbim tjetër në përputhje me qëllimin e krijimit dhe statutin e saj.

3. Në pikën 10 të kësaj VKM, parashikohet se të gjitha institucionet dhe subjektet publike të cilat kanë në administrim objekte shtetërore, ruajtja dhe sigurimi i të cilave duhet të realizohet nga shërbime të specializuara për këtë qëllim, i drejtohen, me kërkesë kësaj shoqërie për të përfutur shërbimin e ruajtjes dhe sigurisë fizike. Nëse kjo shoqëri, sipas pikës 11 të VKM, merr vendim për pamundësinë e ofrimit të shërbimit të kërkuar, institucionet dhe subjektet publike, mund ta sigurojnë këtë shërbim në përputhje me legjislacionin përkatës në fuqi.
4. Në nenin 7 të kësaj VKM, është parashikuar edhe mënyra e përlllogaritjes së tarifave të shërbimeve specifike, që u ofrohen subjekteve publike, tarifa të cilat përcaktohen me Udhëzim të Përbashkët të Ministrit të Brendshëm dhe të Ministrit të Financave dhe Ekonomisë.
5. Tregu i ofrimit të shërbimeve të rojeve fizike ka qenë objekt hetimi në disa raste nga Autoriteti i Konkurrencës, ku ka pasur një sërë ankesash lidhur me këtë treg. Komisioni i Konkurrencës, me disa vendime ka konstatuar problematika, ka vendosur penalitete për disa subjekte që ofrojnë këtë shërbim në treg dhe ka nxjerrë edhe rekomandimet përkatëse lidhur me këtë treg:
  - VENDIM Nr. 240 , datë 26.07.2012 “Për vendosje gjobe ndaj ndërmarrjeve “Eurogjici Security” Sh.p.k, “Toni Security” Sh.p.k, “Eurogjici Security 1” Sh.p.k, “Nazëri – 2000” Sh.p.k, dhe “Dea Security” Sh.p.k për kufizim të konkurrencës në tregun e prokurimit të shërbimit të ruajtjes dhe sigurisë fizike;
  - VENDIM Nr. 283 , datë 08.05.2013 “Për mbylljen e hetimit të thelluar në tregun e prokurimit të shërbimit të ruajtjes dhe sigurisë fizike në qytetin e Korçës”;
  - VENDIM Nr. 287 , datë 04.06.2013 “Për mbylljen e procedurës së hetimit paraprak në tregun e prokurimit të shërbimit të ruajtjes dhe sigurisë fizike në qarkun e Gjirokastrës dhe qytetin e Sarandës”
  - VENDIM nr.317 , datë 23/05/2014 “Për mbylljen e procedurës së hetimit paraprak në tregun e prokurimit të shërbimit të ruajtjes dhe sigurisë fizike në qarkun e Dibrës”
  - VENDIM nr. 407 , datë 8.03.2016 “Për mbylljen e procedurës së hetimit paraprak në tregun e prokurimit publik me objekt “Ruajtje objektesh për vitin 2015”, ndarë në 13 lote, zhvilluar nga Drejtoria e Përgjithshme e Tatimeve”
6. Në datën 4 Korrik 2019, janë zhvilluar seanca dëgjimore më ankuesin, me përfaqësues të shoqërisë “Illyrian Guard” SHA dhe me përfaqësues të Agjencisë së Prokurimeve Publike.
7. Lidhur me shkelje të dispozitave të ndryshme ligjore të ligjeve specifike, Autoriteti i Konkurrencës është informuar nga përfaqësuesit e “Union Security Albania” se ka filluar proces gjyqësor pranë Gjykatës Administrative të Apelit Tiranë, në lidhje me këto pretendime.
8. Përfaqësues të shoqërisë “Illyrian Guard” SHA, paraqitën faktin se kjo shoqëri është relativisht e re, e sapo krijuar. Vizioni i kësaj kompanie është ruajtja e sigurisë fizike me metoda SMART dhe ku do synohet menaxhim nga salla, me pak burime njerëzore dhe pa kosto. Nuk ka filluar akoma aktiviteti dhe nuk janë lidhur akoma kontratat e para.

9. Nga Agjencia e Prokurimit Publik na u bë me dije se jo çdo lloj shërbimi mund të prokurohet. Ka lloje shërbimesh që mund të sigurohen vetë nga institucionet publike sipas nocionit të “*in house procurement*”, ku vetë institucioni i plotëson nevojat e veta me burimet e veta.
10. Konstatohet se me VKM Nr. 117, datë 04.04.2019 “Për krijimin e shoqërisë “Illyrian Guard” SHA dhe për përcaktimin e Autoritetit Publik, që përfaqëson shtetin si pronar të aksioneve të kësaj shoqërie”, është krijuar një shoqëri e re, me kapital shtetëror e cila do të ofrojë midis të tjerave dhe shërbimin e ruajtjes dhe sigurisë fizike. Parë në këndvështrimin e konkurrencës shtimi i numrit të ofruesve të shërbimeve në treg favorizon konkurrencën e lirë dhe efektive duke sjellë mundësi zgjedhjeje.
11. Në respektim të dispozitave të Ligjit 9121/2003 shoqërisë “Illyrian Guard” SHA, të cilës i është dhënë e drejta për të ofruar shërbimin e ruajtjes dhe sigurimit të objekteve shtetërore siç përcaktohet në pikën 10 të VKM, duhet të silllet në një mënyrë të veçantë, duke respektuar parimet e konkurrencës dhe në veçanti parashikimet e nenit 9 të ligjit.

#### **PËR KËTO ARSYE:**

Komisioni i Konkurrencës, bazuar në neni 24, shkronja (d) (f), nenin 29/1, nenin 69 dhe 70 të Ligjit Nr. 9121, datë 28.07.2003 “Për Mbrojtjen e Konkurrencës”, i ndryshuar,

#### **VENDOSI:**

1. T’i rekomandojë shoqërisë “Illyrian Guard” SHA, që gjatë ushtrimit të aktivitetit të saj të respektojë parimet e konkurrencës dhe dispozitat ligjore që burojnë nga Ligjit nr.9121, datë 28.07.2003 “Për Mbrojtjen e Konkurrencës”, i ndryshuar dhe sidomos respektimin e nenit 9 të këtij ligji.
2. Ngarkohet Sekretari i Përgjithshëm për njoftimin dhe ndjekjen e zbatimit të këtij vendimi.

Ky vendim hyn në fuqi menjëherë.

#### **KOMISIONI I KONKURRENCËS**